

3 langile hil dira 24 ordutan

Gaur eguerdian, Amurrioko Tubos Reunidos enpresan, Pavinpront azpikontratako langile bat hil da altueratik erorita. Honetaz gain, LABek jakin berri du atzo, maiatzaren 26an, 49 urteko A.H.G. langile azpikontratatua hil zela Atxondon, AHTren lanetan. Pieza baten erorketak zauri larriak eragin ostean, odolustuta izan zen CONPROVIAL enpresarentzat lanean ari zen langilea. Bi hauei atzo Andosillan hildako 50 urteko langilearena batu behar zaie. Hiru hauekin, gutxienez 23 dira lan heriotzak Euskal Herrian urte hasieratik.

Ezer baino lehen, LAB sindikatuak elkartasun eta babes osoa adierazi nahi die hildako langileen familiei, lagunei eta lankideei.

Euskal Herrian istripu hilgarrien inzidentziak ez du etenik. Altueretako istripuena da honen islada, prebentziorako neurri teknikoak hartzen erraza izanik istripu hauek gertatzen jarraitzeak honakoa uzten du argi; patronalak muzin egiten diola araudia betetzeari. Beste era batera esanda, patronalak amilarazten gaitu.

23 hil dira aurten dagoeneko istripuz, hauetatik bi altueratik erorita. LABek argi dauka, altueretako lanen segurtasun-araudia aplikatu izan balitz, ez zen lan-istripua gertatuko. Arazoa da patronalak ez duela betetzen laneko segurtasunari eta osasunari buruzko araudia, lan-kostuak merketzeko. Heriotza mota hauek ekidin daitezke, guztiak, prebentzio-jarduera behar bezala kudeatuz, integratuz eta aplikatuz.

Lan istripuen eta laneko gaitzen atzean araudia ez betetzea dago. Hau enpresen ardura zuzena da, hildakoek badute erantzulea.

Azpimarratu behar da araudi horren bermatzailea Jaurlaritza dela, baina enpresei betearazi beharrean patronalarekin konplizitatea erakusten duela prebentzio proiektu antzuak adostuaz, diru publikoz hornituak, helburu bakarra diru banaketa delarik eta egoera hau betikitzea. Hori da egun Osalanek erakusten duen jarrera, isuntzeko gaitasun eza baliatuz patronala babesteko. Iaz Euskal Herriak pairatutako 102.000 istripu eta 64 hildakoen atzean arduradun politikoak ere badaude.

Amurrioko Tubos Reunidoseko lantegian bertako enpresa-batzordeak lana 24 orduz etetea eskatu da. Honekin batera, enpresa-batzordeak kontzentrazioa deitu du bihar, maiatzaren 28an, lantegi sarreran goizeko 9:00etan.